

# DEEL D OPENBARE VEILIGHEID

## REGULASIES

### D1 VERANDERING VAN VLAK

Die beveiliging van die rand van 'n balkon, brug, platdak of soortgelyke plek moet so ontwerp wees dat daar verhoed word dat 'n persoon van sodanige balkon, brug, platdak of soortgelyke plek afval.

### D2 VOETGANGERINGANGE TOT PARKEERGEBIEDE IN GEBOUE

Indien 'n voetgangeringang tot 'n parkeergebied in 'n gebou voorsien word, moet sodanige ingang so geleë, gemerk en beveilig wees dat geen voetganger per abuis voor 'n bewegende voertuig kan instap nie: Met dien verstande dat hierdie vereiste nie geld ten opsigte van 'n gebou wat ingevolge regulasie A20 as H4 geklassifiseer is nie.

### D3 OPRITTE

'n Oprit of inrypad moet so ontwerp wees dat dit veilig is tydens gebruik en geskik is vir die doel waarvoor dit bestem is.

### D4 SWEMBADDENS

(1) Die eienaar van 'n perseel waarop daar 'n swembad is, moet toesien dat toegang tot sodanige swembad beheer word.

(2) 'n Eienaar wat versuim om aan die vereiste van subregulasie (1) te voldoen, is aan 'n misdryf skuldig.

### D5 GEAG-TE-VOLDOEN-VEREISTES

Daar word geag dat daar aan die vereistes van regulasies D1, D3 en D4 voldoen is indien 'n verandering van vlak, die ontwerp van opritte en inrypaaie, of toegang tot swembaddens, na gelang van die geval, aan Deel D van afdeling 3 van SABS 0400 voldoen.

## GEAG-TE-VOLDOEN-REËLS

### DD1

#### ALGEMEEN

Daar word geag dat daar aan die regulasies vervat in Deel D van die Nasionale Bouregulasies voldoen word indien 'n verandering van vlak, die ontwerp van opritte en inrypaaie, of toegang tot swembaddens, na gelang van die geval, aan die geag-te-voldoen-reëls in die volgende bepalinge van hierdie Deel voldoen.

### DD2

#### VERANDERING VAN VLAK

#### DD2.1

'n Balustrade of muur wat opgerig is om 'n verandering van vlak te beveilig, is onderworpe aan die vereistes van regulasie B1.

#### DD2.2

Die rand van 'n balkon, brug, platdak of soortgelyke plek wat meer as 1 m bokant die aanliggende grondvlak of vloerhoogte is, moet van 'n balustrade of borsweringmuur met 'n hoogte van minstens 1 m voorsien word, tensy ongemagtigde toegang daartoe verhoed word deur 'n fisiese versperring wat behoorlik opgerig is en in stand gehou word.

DD4

**SWEMBADDENS**

DD4.1

Die eienaar van 'n perseel waarop daar 'n swembad is, moet deur middel van 'n muur of heining verseker dat geen persoon toegang tot sodanige swembad kan verkry vanuit 'n straat of openbare plek of aangrensende perseel nie behalwe deur 'n selftoegaan- en selftoekniphek met voorsiening vir die toesluit daarvan in sodanige muur of heining: Met dien verstande dat indien 'n gebou deel van sodanige muur of heining uitmaak, toegang deur sodanige gebou verkry moet kan word.


DD4.2

Sodanige muur of heining en sodanige hek daarin moet minstens 1,2 m hoog wees, van die grondvlak af gemeet, en mag geen opening hê waardeur 'n bal met 'n diameter van 100 mm kan gaan nie.

DD4.3

Die konstruksie van sodanige heining of hek moet aan die vereistes van SABS 1390 voldoen.

*Kommentaar: Figuur 2 illustreer wyses waarop toegang tot 'n swembad beheer kan word. Ander metodes vir die beskerming van kinders teen die gevare van swembaddens word in SABS 0134 aangegee.*



Tek.11013/A